

Christian Meivah



July - August, 2019

Lhani seh thuso

Private Circulation

Pathen toh kivop khom

(Dr. Billy Graham)

“Pakai in amite jah-a, lam som dunga dingun, veuvin. Lamlui ho holun lang lampi phapen umna dongun. Hiche lampi chu jui un, lung mongin hinguvun nate, ati” (Jer. 6:16). Hiche sim nangma iti nahin hinam? Nalhagao lungmong tam, ki pana le lungdamna nanei nah em? Ahiloule lunggim lungdongna in nalo jeng em?

Pathen toh kicham ding dan akihet masangin, lunga chamna aki nei ngeipoi. Pathen het a kona chule Pathen toh kilhona lamjot khoma kona kimu chamna chu kasei ahi. Pathen toh kivop a kijot khomna dia thil phabep het ding ahi.

1. *Amasan, Judas Iscariot* : Jesu seijui khat ahi vangin, alungthima Jesu toh naichaa kivop a anung lung lut a jui ding atipon, ahindan hi seijui dang hon anahe poi. Jesun, “Hiche nikho chule mi tamtah hung uva, Pakai, Pakai, keiho namina gaouthu seisa, thilha nodohsa, chule thil ki dang bolsa kahi louvu ham, ati diu ahi. Chuteng ajah uva phong tah-a, Vo dandih lou bolte, kakoma konin potdoh loi un, nangho kahe khahih helui, kati ding ahi” ati (Mt.7:22-23).

Tah beh in, amahon Jesu minin thu anasei ui. Amahon gaouthu jong anasei nauve. Amahon thilha jong tamtah ana nodoh nauve. Japi din thilpha tampi anabol nauve. Pathen thu jong ana lhangsam le nauve. Ahinla amaho chu huhhinga ana um kha loulai ahiuve. Pathen lekha bun, “Sopite, nakikou naule naki lhendoh nau chu, kichet sahna din, kihabol cheh kit un” tin Peter in anasune (2 Pet.1:10). Ahile sopi, nang Pathen toh naki guijop hitam? Chapang neo khat in anu le apa atahsan jeng bang a, Jesu hi natahsan tengle aimatih chana nakijop mat ahitai. Hichu Jesu kisan kiti chu ahitai.

2. *Aninaa, Pathen kouna* : Jere-miah themgao in, “Nathu hin ka sunga meikou bangin, eileu saveh vuh jenge. Imchah kkeh ding kagot vangin, ka-im lhum jou hih hele” ana tin ahi (Jer. 20:9). Asima, nangma gule chang sunga jong hitia hi mei kouvin naleu banga sakha tam? Na lungthima chu, Pathenin ama thu sei dinga nakou khah hitam? Christian hia Pathen kouna hepha loulai chu abulhing loulai ahi. Nahatna nabol theina ho chu, nangma hetna thepna chihna jeh a um ding ahipon, Pathen in nahin peh ding joh in gelin.

Tulai hin numei pasal tampin Bible asimun, Pathen solchah hina hi jildoh ding agouve. Ahinla Pathenin hiche kin dia akou lou mi amam jie. Malai solchah te, “Kei nin vang kamusa le kajahsa, lhon chu kaseida thei lhon louhel ding ahi” tin Peter le John in ana sei-e (Acts 4:20). Paul in hitin asune, “Kabol lou khoh eikise khum ahibouve, ajeh chu kipana thupha seiphong louva um hileng, kei dia iti khoh a khoh ding hitam!” (1 Cor.9:16). Pathenin akouna ahijeh a aboltei ngai ahitan, thildanga alunglut jou tapoi.

3. *Athumnaa, Pathen houna* : America a Bible kisimna muna thudoh ana kinei a chun, mi jakhat sunga 93 in, hitin ana sei ui, “Kei hin kachangin Pathen houna phat kamang kha polai-e” atiuve. Pathen thu chu ama ho lhohbua ana umnan, ahinla ama ho gule chang sunga chule alungthim sunguva ana umpoi. Hito bang miho chun Pathen thu hinlhang sam jongleu, angai hon kilahlut lou diu ahi. Ajeh chu Lhagao Theng in asung uva na atongpoi.

Niseh a achanga Pathen to kivopna phat manglou mi chun, Pathen thu sei jong le min angainom lou ding, chule akilah lut lou diu ahi. Ajeh chu thaneina hi eimaa kon hilou Pathen a kon joh ahi. Pathen lhagao in niseh a eisuhhal uva, thao einu jingu angai-e. Hichu Pathen toh phat mankhoma kona kimuji ahi. Pathen to niseh a lungthima kihou angaiye.

2
4. *Alinaa, Pathen thu* : Paul in hi tin asune, “Thingpel thu hi, amang thah ho dinga ngolkai tah ahin, huh hinga umho din vang Pathen thahat na ahi. Ijeh inem itile Pathen lekha bua kisun chun, keiman miching ho chihna kasuh manga, het theina nei ho hetna moh kahi sah ding ahi” ati (1 Cor.1:18-21).

Paul in cross a kithat Jesu thu ana lhangsap chun, mihon anui sat uve. Hiche hi tulai ikichih sahnau tobang ahi. Ahinla cross a chun tha neina kiselguh aumin, chuche khang lai miho hinkho anakikhel sah jouvin, chule tulai miho hinkho jong akikhel sah jinge. Ahile sopi, nangin tua na hinkho chu chamna le lungmonna nakikhel sah nom lou ham?

5. *Anganaa, mipi ding lunggel* : Tulai mihemte thil le lo lama angai chat-u themkhat beh isuh bulhit peh joulou ule, Pakai thusei jui ihi thei pouve. Mihemte ngaichat ihet pehu angai jie. Pakai Jesu jengin jong, mihemte ngaichat ho ana hetpeh in ahi. Bible in, “Miphah khat Jesu henga ahungin, aboh khup in ajah a, nalung ahile neidam theng sah thei ahi, tin atao tai. Hichun Jesun alainat pin, akhut alhangin athamin, ajah a, kalung ahi damtheng tan, atile chu pet tah chun atiphah chu apha pai jengin adam theng tai” (Mk.1:40-41). Hiche lai khang min dondaa akoi, nahsah lou tah a kinei mi chu miphah (Leprosy) hohi anahi. Mi koiman adon nomtah lou, avela jong kithah ngamlou, anat nau kila khante

tia, kikicha mipah chu Jesun ana thame. Ngailut in kidah asumange. Miphahpa chu akito khah leh ipi itim ? Nang hi kangailui ti aheth sah ahi. Jesun angailun ana damsah tai.

6. *Agupnaa, thu lhangsap* : Na insunga, na houbunga, chule navela miho koma thu nalhangsap hinam ? Israelte lah a phungni ana umin, Reuben phung le Gad phung, hin Israelte phatchomna ding gel sangin, amani phung seh phatchomna ana ngaito lhone. Hijeh chun hitin ana kiphoh lhon tai, “Nasopite ho galsat a ache pet a, nangho hia nom tah a natovu dih nasah nah um ? Achutile phaten kingaito uvin, na chonset nauvin nahin holdoh diu ahi” ati. Hiche thucheng ho hi Pathen thu lhangsam nomlou ho henga jong kisei tobang ahi. Mi athi ding leh athia tamtah aum hena, khohsah louva nomtah a kitou thim beh ho chu, pho-na changkha ahi uve. Niseh a nikho thah namu ji chu, nang dia nahinkho kichaini hidin geljin, chule Pathen na naha tohnin mangin. Ajole tongman louvin, thi khan natin, khut goh keuvin van gam jon khan nate.

7. *Asaginaa, kiloikhom hinkho* : Na christian chanpi ho nangailut hinam ? Paochom tho, gam chom mi, jat le nam chom mi, ahivangin, nasopi khat tobanga nagel theiji hinam ? Pentecost nikho chun mi tamtah ana kikhom ui. Seijui ho chu lungkhat tah in ana pang ui. Chule

Peter in Pathen na atoh dan chu John a sangin achom jep in ahi. Chule kho nunga Pathen natong Paul tohdan chu achom beh ahikit-e. Pathen tah san ho lah a kibung khenna aum doh chu, Paul in nommo anasai. Keima tah jong hi, New Testament in adoi Christa mina sopite jouse kingailut to cheh a, khat a lonkhom tei ding hi kadei chu ahi. Ahile insung khat hinaa imelchih diu chu :-

1. Khat in khat alungset ding, thinaa kona hinna a galkaite kingailut to cheh ding ahi.
2. Kijento ding ahi. Nalah uva alen pen hinoma chun kineo sah a mi ajen ding, chule Jesun seijui te keng aban chaa asilpeh chu geldoh jing ding ahi.

3. Khat le khat kikhah a thoh hatna nei ngai ahi. Lung neng tah a mito kitona ding, lunggel nei jing ding ahi.

4. Khat le khat kingaidam to jing ding ahi. Min eingaidam masanga eiman ngaidam ding angai-e. Achuti loule Pathenin ithemmo nau ho ei ngaidam lou diu ahi. Christa jala ngaidam ding ahi.

5. Kihuto kikhosah ding ahi. Thil pha lama mi pui ding chule mi pa chatje leh tilkhoh je het ding ahi.

6. Kitaopeh to ding ahi. Pathen hou mi hi-a taona phat neinom lou mi chu alhasam ahi.

Nalung sunga Pathen kilang jing hinam ? Pathen toh nakivop jing hinam ? Vannoi leiset hinkho kichai vah ding ahitai. Kichih thei in.

Khat chu thum ahi

Pathen khat seh chu thum ahi, akitin, amaho khat cheh chu Pathen mama ahiuve. Pathen hina Pakai thumin anei ahi. Datmo um tah ahin, leiset mihem dia hithei lou, van Pathen dia himo lou ahi. Mat. 28:19 in, “Hijeh chun cheuvin lang namtina mi jouse seijui in gasem tauvin, amaho chu Apa, Acha, chu le Lhagao Theng minin baptise ga bolun” tin Jesun ana sei-e. Hia ‘minin’ kiti hi khat kiseina ahi. Pakai thum chu Pakai khat hia ahi. Chu le 2 Cor. 13:13 a Paul in, “Pakai Jesu Christa lungset, Pathen ngailut, chule Lhagao Theng kithopi nan, nabon chauvin umpi hen” tin asune. Hia hin jong Pathen thum chu khat ahidan akisei-e.

Old Testament a Pathen thum chu khat ahidan, kicheh in kimu hih jongle thum ahina akilang jin ahi. Hebrew paochenga Pathen hi Elohim akitin, hiche hi khat kihetna ahpoi. Chule Gen. 1:26 a Pathenin, “Eiho lim le mel pun, mihem semu hitin ...” tia kisei aume. Hiche a ‘Eiho’ kiti hin Pathen khat chu thum ahina aphonng doh in ahi.

Gen. 3:22 a Pathenin, “Mi hem hi ilah uva, khat bangin, thilpha thilse hethei in aumtan ...” tin aki sune. Hichea hin jong Pathen thum chu khat bou ahi, tina imuve. Isaiah 6:8 in, “Koipen kasola, kon kathu -u agaseile ding ham ?” tia kisun hi melchih thei ahi. Hia “Kon kathu-u

aga seile ding ham ...” kitia hin Pa then khat seh thum ahina akilang kit in ahi. Hijeh hin Pa Pathen, Chapa Pathen, Lhagao Theng Pathen, hi thum ahi vangin khat ahi, tina ahitai.

Pathen hi khat ahin, simtho ding ahi tengle thum ahi jie. Mi kim khat in Pathen hi twi toh atekah in, twi hi avot teng buhbang (gel) aki tin, atui-a aum teng twi akitin, chule ahu-a aumteng twihu akitin ahi, tia aseichet jiu aume. Ahiloule ahtui tojong atekah un, ahtui hoh, ahtui sunga tuikang, chule ahtui sunga tui a-eng, thum hi ahin, ahinla khat khat chu ahtui akiti thei cheh-e, tia sei jong aume. Iti akisei vangin, Pathen khat Pathen cheh thuma aumna hi akisei chen joupoi. Ajeh chu leiset paova sei chet thei hilou ahi.

Mi kim khat in, Pathen hi pasal upapu khat toh jong atekah in, upapu hi mipa, apa dia achapa, chule ajinu dia ajipa ahin, ahinla mi khat bou kiseina ahi, ti jong aume. Hiche tekah na hin, aseichet joulou chu pasal khat chu phat khat a mi thum a umthei lou chu ahi. Ipi chu hita jong leh i-Pathenu hi khat chu thum ahi.

Pathen hi phat khat-a mun jousea umthei ahin, phat le nikhon ama hi asukhen theipoi. Phat le nikhon hohi hiche leiset a ahibouve. Pathen in ima jouse amun, ahen, mi min jouse jong ahei. Tekahpi bei Pathen ahijoi. Ama thi theilou ahin, eiho vang thithe cheh akihi, ti heute.

Baptise chan ding dan

Jesu Christan anatoh apat maheuvin, John Baptist in, mi tam tah 'Lungheina Baptise' ana bolin ahi. John hi Pathen themgao ham ? Lk.1:63-67, Mt.11:9-11 simin. Koi natong dia John chu hunga ham ? Lk. 1:76, Mt.3:1-3, 11:10 simin. John chun twi a mi Baptise anabol em ? (Jn.1:26-33). John chu koipen tah in ahin sola chule mi Baptise abol na dia thaneina anapeh ham ? Lk. 3: 2-3, Mt.21:23-27 simin.

John hi, mi Pathen tahsan auma, alunghei-a ahile twi a Baptise chansah dia Pathenin thaneina le thu neina puma ahinsol anahi. Hijeh hin Baptise chan kiti hi, min alung ahei na chu polama muthei a kilan doh sahna chu ahitai. Hiche hin, mi khat ana chonset hoa kona kisu theng ahi avetsah ahi. John in mi Baptise ana chansahna ajeh pipen chu, 'chonset ngaidam ahina dinga lunghei a Baptise hi' chu ahi. Koi hijongle achonset hinkhoa kona kishih a, lung hei chu ngaidam ahitai ti het sahna a Baptise kibol ahi (Mk. 1:4-5, Mt. 3:2-11, Lk. 1:16-17).

Ahinla lunghei-a John khut a Baptise chang ho chu, Lhagao Theng ana kipe hih lai ui. Ajeh chu Lhagao Theng hi Jesu thinaa kona athokit chule vana akaltou jouva bou, atahsante hung kipea ahi (Jn. 7:38-39). Jesu tahsan pou pou Baptise achan teina ding thu hi Acts

5

2:36-41 a aume. Kum A.D. 31 a Pentecost nikhoa Peter in Jesu tah san ding thudol alhangsama chun, angaiho jong chu Messiah kithanaa chan anei danun aphoh tan ahile ama hon dih asauvin, alung ahei un, chule Baptise anachang tauve. Hia kona imuu chu, twi a Baptise chan kiti hi sochatna dia Pathen ngaichat khat ahidan akimui. Twi-a Baptise chan hin, Jesu athia, akivui a, chule atho doh kit chu avetsah ahi. Chule mi chonse khat chonset a athia, akivui a, chule Christian khat hinkho mang dia athodoh kit jong avetsah ahi.

Pentecost nikhoa Peter in Jerusalem a Jew ho koma, kipana thupha anasei jou kum som velin, Pathenin ama hi Gentile ho henga Kipana Thupha seiphong din ana sole. Hougut Italy mi Cornelius kiti pa henga ana kisol masa pene (Acts 10). Jesu tahsan a lunghei ho chu Lhagao Theng nei hih lai jongleu Baptise kichan sah anahi (Acts 2: 38). Ahinla Pathenin kidang tah in Cornelius te chu Baptise achan ma sang un, a Lhagao ana pejeng tan ahi (Acts 10:47-48).

Hiti ho akivet chila ahile, mi Baptise chansah hi Pathenin jong adei ahi, ti akimui. Achuti loule Baptise channa ding thupheh hi anapeh lou ding ahi (Mt.28:19). Bible a Gentile mi Baptise chang masapen hi Cornelius ahi. Christian dihtah hinom jouse Baptise achan ngai ahi. Hiche hi Pathen deilam ahi.

Pathen dei-a kihei toh

6

Paul in ami Israelte lungtah jeh a, paidoh a aum nau alainatpi jeh a, Pathen dei-a mihem kihei tohna hi (1) Pathen thu thu ahin, (2) mihem heitoh thei ahipoi, chule (3) Israel ten kihei toh agotnau dih louje ase ho aume.

1. *Mihem heitoh* : Pathen dei-a mihem heitoh chu Pathen ahi. Mi hem hi leiset leivui a aum pet a, Pathen lim le mel pua, hinsem doh chu Pathen ahin, mihem ama kistem ahipoi. Anu oisunga mihem kistem doh jong Pathen sem ahin, mihem in asem ahipoi. Mihem ache khela Pathen toh akikhen phat a, akigop kitna ding jong mihem bolthei ahi pon, Pathenin agontohsa banga hei toh agotna chu tahsan ding ahi.

Mihemin Pathen thu apal keh-a, athilo phat a, ahindoh kitna ding jong Pathenin agonsa banga achapa ahinsola, Jesu tahsan chan lhenchom hia, hingdoh ding ahitai.

2. *Jesu jeh-a lhenchom* : Pathen in mihem alhen chom hi Pathen chapa jeh ahi. Pathenin mihem lah a adei dei alhena, adeilou apai ahi pon, amasaa amatoh hingkhom ding a asem doh, chule chonset jeh a mihem in athilo phat a, hinkhom kit theina ding chu Pakai Jesu tahsan ding laitah hi ahin, koi hijongle Pakai Jesu tahsan chan chu mangthah lou va tonsot a Pathen toh hingkhom dia Pathenin ahin gon ahitai. Pathenin mi koima amansah nompoi.

Pathenin mihem adeilhen na chu adei bolpa Pakai Jesu tahsan na hi ahin, alhen lou ho chu Pathen dei banga Pakai Jesu tahsan lou ho ahin, hijeh a hi Pathen themmo sah thei ahipoi. Athemmo mihem joh ahi. Adam le Eve in, Pathen thupheh apalkeh a, paidoh a aum lhon banga a, Pakai Jesu tahsan lou ho chu Israel mi hijongle apai jeng chu thildih ahijoi.

3. *Tohdoh tho ding* : Israel ten danthu chu juikima hinpi agot banga, sochatna hi tohdoh tho ding go jou sen ajolou ding paidoh a uma, athi lo cheh ding ahi. Tonsot hinna hi mihem toh doh jou ahipon, Pakai Jesun atoh doh peh a, Danthu dei-a thia, ahivanga ahindoh kit a kona chu, Danthu dei ho abol soh-a, Jesu tahsan vanga tonsot hinna kilason ahi.

Danthu jeh a, mihem thisa chu hindoh kitna dia chu, Pakai Jesu Danthu joupa, tahsana, amato hin khomna lhagao nei chu manbei, leh ama tohsa kichang joh ahin, tonsot hinna man bei-a kichang ahitai. Ajeh chu chonset a thina chu Pakai Jesun athilo a, Jesu vanga mihem hing doh kit ahitai.

Jesun vannoi alungset beh seh-a, mi chonse ho huhna dia aman eithi piu hi thupi tah ahi. Chonset thahat thina chu Pakai Jesun ajoa, Jesu thinaa kona ahin doh kit tahsan jouse, atahsan vanga aman bei-a hing doh ihi tauve. Hijeh chun, hiche ho hin gong toh chet Pathen ahin, Pathen thangvah in um jing taken, Amen.

(Dr. T. Lunkim)

Pathen manchah mihem

Pathen manchah miho le aman chah lou ho geldoh in aphaï. Hou natong hon agel diu chu, kei hi Pathenin eimanchah ham, ahilouleh keima kihabol a tonga kahim, ti gel doh jiding ahi. Saul lengpan Samuel pa jah a, ven keile kei ki-eng bola thilto ding ho chu kanato ahi, ati (1 Samuel 13:2). Hitobang a hi, nang ma jong Pathen manchah hilouva nangle nang ki-engbola Pathen na natoh hikhat tou ham ?

1. Pathenin amanchah mi masaholah a Noah chu, sochatna kong sem din Pathenin akouvin amangchai. Canaan gam lodin Abraham akouvin, amangchai. Egypt te soh a kona puidoh din Pathenin Mose akouvin amangchai. Pathenin amanchah ding ho chu akouvin amangcha jie. Kou hilouva kimangcha themgao ho jong aumda poi. Tulai Pathen natong ho jong, Pathenin akouna kihet louva, na tonga jong aumda poi.

2. Pakai Jesun solchah 12 ho akou in amangchai. Solchah Paul jong akouvin amangchan ahi. Pathen kou miho chun akoupa lung lhaina ding aholin, akoupa thu angai in, houbung hon jong ama chu angailu jiuve. Tu lai mite umdan ho ivet leh akikou ho sangin akikou louva ama thepna hetna mangchaa natong atam phat hin, houbung ho aboi gam tai. Van kouna changkha sopi theng teho ki ti aki um tapoi. Houbung ho le kiloi

7

khomna ho kou, deichoma kikou kilalut, natoh kipe tampi aumtai. Sei phat le kipachat tona dinga natong aumtai.

3. Pathen lhacha ho akiti teng mi jouse lhacha ahitheï poi. Rev., Pastor, evangelist, missionary ho bou Pathen lhacha ahïuve. Pathen natoh akiti teng, mi jouse ahitheï ui. Mit cho elbai hon jong atong theï uve. Ahinla lhacha kiti hi, mi khat in kin anei teng, ama lhacha dingin tucha, becha, ho akouvin, amaho chu ama lhacha ahïuve. Ama kina hung ki mangcha jouse chu anatong ahïuve.

Pathenin akouva aman chah mi atampoi. Satan manchah theï, ahiloule lekha them miching vang akitam mama tai. Nampi suboi theï, kipum khat doudal, mi sukhen theï akitam tai. Pathenin akouva amanchah miho chun, hou bung akhantou sah un, asemphau vin ahi. Amaho chu min jong angailu vin, houbung le mimal in jong ama kou ding chu akichu thoi. Pathen manchah miho chu achenal lam lam a, min ajuï jiuve.

Vohpi khat hoïmo lhez jinglé, anouten ajuï demdum jiuve. Aman noitui anei jeh ahi. Vohchalpa vang ahoï lhez nan, vohnou ten jui din jong ago pouve. Ajeh chu aman noitui aneïpon, vohnou neh theï anei poi. Chapang khat in, bulhang aki dop a avale leh ahcha uïchan ajuïle le jiuve. Abumal lhajah akilo jiuve. Hiche banga chu tulai-a nangman

8

bulhang nakidop hinam ? Peter in hinna changlhah bulhang akidop a Pentecost nia thu aseïleh mi 3000 in alung ahei un, Jesu akisan ui. Ahi leh nangma thuseï a kona mi ijat na pentah sah jou tah em ? Bulhang nakidop lou hitam ! Bible nakipoh lelea mi ijat nahuhhing tah em ? Na Bible kichoi a mi khat jong nahuhhing louva ahïle sumbom ahom keo nakipoh lele ahïbouve.

Ahïle, koiham Pathen manchah chu ? Pathen kou Pathen manchah ho chu, Peter chule Paul teho tobang ahïuve. Pakai Jesun atahsan ho chun thil kidang abol theï diu ahi ati. Thilha anodoh diu, ana adamlou adamsah diu, ati bangin, Pathen manchah ho chun hïchu anei diu ahi (Mark 16). Thil bolna lam leh lekha simna lama vang mi phah chan chan ipha nauvin, Lhagao natoh le Lhagao thilpeh lama vang seïdoh theï ding inei-u mutheï in akilang doh hih lai-e. Ahïle eiho hi Pathen manchah theïlou ihïu hitam, Pathen a kipelut jep ute.

(Rev. Seikholen Lenthang)

America te inchen hinkho

America te hinkho mandan hi achang changa cheng abang ui. Hengle kom kingailutna umlou abange. Inlen khat a Flat khat naki choh a nachen lut tengle nakoma ho toh nakimuto ji tilou adang chen khompi toh kimuto natheï aum jipoi. India te vang hi khat le khat kivilto kimuto akibol jin, kikholai lento ho

jong aume. America a hïchu aumpoi. Amasanga seïpeh masat louva koi ham khat ina nache leh nalut sah pou vinte. Amahon mihem kingailut na sangin, dan dung juiya chonna adeï jiuve. Insung jousen ama ama in anei ui. Ain ina aboi cheh uve. Atoh diu le achenal diu ho abona aphaï akisem toh masat jiu ahïtai. Office kaiho chun a-office uva na hatoh in atong jiuve. Suti nikho jongle koïma lamlen dunga vah cheh le kichemle aumpoi.

America a meïthal hi anche boh bangin akijoh-e. Ichoh nom phatle kichoh jeng theï ahi. Achoh ahïti bailam jeh a hi, akikap akithat kihe man jïlou ahi. Thal chohna din eiho lama bangin, License angaïpoi. Munlen ho le khoneo ho jenga jong Library aume. Library hi amaho din Cultural Centre khat tobang ahi. Mi jouse Library a ache nom jin, mi atam jin, lekha simnom, golle pai to kimuto nom, chule kihoulimna mun in amang ui. Kho neocha cha hon jong Gov't a ahiloule private library le museum anei cheh in ahi.

Khopi le khoneo hoa jong Gov't. school ho aumin, kihïlna ho athupin, hetgïlna dia kihïlna mun ahi. Primary le Junior College hoa sum akipe poi, Free of Cost ahi. Lekha simho chu top class environment apeuvin, chule amaho chu khonunga citizen phatah ahïna din asemui. Chapang neo akum 12 sung ho koïman achang in avale sah jipoi. Amaho chu mi akum 16 chunglam khat in

achin le akilhonpi angai-e. Lampia School Bus alhai-a ahile Gov't gari hihen Police gari hijongle akhal ding phal ahipoi. America te inchen dan hi saangtah ahin, thupi tah a hinguva, ama ama insunga aboi-a boi cheh ahi jiuve. Haotah a chule thupi tah a incheng jong ahikit uve. Theng tah a cheng ahiuvin, lamlen ho jong anen kimu lou ahi.

Judon (Jukham) pham ?

Tahsa dia akisei leh dam theina ahi sanga hinkho chomna joh hia, chule lhagao lam dola akivet leh Pathen intheng suh bohna thil hi ju ahi (1 Cor.3:16). Thajung hoa mi hem thi tang louva kitolle jing ahin, ju don ho thajunga thi atui a longjing chu, aha ahung um chet chut jin, hiteng chule thi aha ho chu, thi lonna thajung asung homa chun abeh den jiuvin, ako chu aneosah ji tauvin, mi chu athi athajunga alhingset in alhai le jou tapon, ajo jonan athajung chu ahom asubing in, thajung pohkeh a mi thi ham, athajung athi jeh a mi chu atha hung bei doh ham, akhut akeng kithing thing ham, alang thi ham ahiji tai.

Pathen lekhabu dola akivet leh Pathen intheng hia mihem tahsa thenlouna le Pathen mitmua miboh hina chu avetsah-e. Mi abang in, Jesun Cana muna mou puinaa chun twi chu ju asosah-e, tin aseui. Ahin la hijong chu, Greek paova 'oinos' kiti ahin, lengpi tui tina ahi. Khamna thei vang hi Greek paovin, 'shekar'

akiti (John 2:1-11). Khamna lung vaina hi thilpha ahipoi. Mihem lung chingtah a Pathenin asemsa chu, mi hemin angol sah a alung avai tengle Pathen deilou tamtah aseidoh, abol doh ji ahi. Shakespeare in, "Mihem lhoh guhmangna dia mihemin akama adonlut gu chu ju hi ahi" tin anasei-tai. Pathen lekha bun judon, jukham adeipoi (Prov.29:1, 20:23-35). Noah jukham jeh a ichana achapa Ham chung a gentheina hung lhunga hitam ! Jule chonchan phat louna aki khen theipoi (Hosea 4:11). Pathen gama lut lou ding ho, 1 Cor.6: 10 a kigol lhaho lah a ju jong ahi (Gal. 5:21).

Lengpan ju ima apeh vang chun Daniel ana kitim in, hijeh chun Pathenin natoh lentah ahinpen ahi (Dan.1:8-20). Katahsa hi Lhagao Theng hou-in ahin, imachaa kasuh boh lou ding ahi. Kachonna le ka neh kadon hon Pathen thu aseui in ahi, ti geldoh jing ding chu Christian khat kin ahi. Nasum nei chu Pathen sum ahin, judon na naneile Pathen nachunga lunghang ding ahi.

Insung kitomona, kinah ki baona atamjo ju in asosah ahi. in sung hi kipana le chamna umna mun dia Pathenin Adam le Eve phatthei anabohsa ahi. Insung suboh mi chu Pathen lunghansah a, ama le ainsung a Pathen gaosapna koulut mi ahin, Pathenin themmo achan ding aumsa ahi (Prov.20:1). Pathen in hia itahsau suboh poute. Asempa lunghanna iki koulut lo diu ahi.

Nui-hi, damna (Prov.17:22)

* Pastor khat in sakol khat anei in, phat khat chun ajoh nom tan, acho ding pa koma, 'kei sakol hi hou na tong khat a ahijeh in, houlam pao cheng in bou katil jie. Hallelujah ka ti teng ache jin, Amen kati teng ading ji tai' anati. Amapa chu, pa tepnan sakol chung a chun atouvin Hallelujah atile achen chule Amen atile ading jengin akichoh tai. Inlam jona sakol chung a chu atouva ahung le, kolse lamneo khat ahinphan ama lam avet leh sakol chu achepai tei tei-a ahile kentong khat a lenglha din aumtai.

Akicha behseh in, sakol din sahna ding thucheng chu aholin, agel doh tapon, sakol chula ache tei tei tan, akicha valin a-ulsa akai jeng tai. Alonaje ahethlou phat chun, Pathen henga anataovin, atao chai-a Amen atile sakol chu adingchot jengin, aki pah lleh jengin, Pathen koma kipa thu alhut in, Pathen thangvahnan aman 'Hallelujah' tia hapena apen leh sakol chu achepan kit in, kolla ani lhonin aleng lha lhontai.

* Hotel a chadona tou pasal ni hi kinaicha atoulhon jeh in, akihoulim lim lhona ahile, khatpa chun, "Kei ho gama lei alaiyuva ahile Telephone gui alai doh ui" atile aloipan "Ipi ti na ahidem" ahinti leh aman, "Hichun Telephone hi keiho patdoh ahi, ati na ahi" ahinti. Aloipa thusei chu ajah da tenin, aman jong, "Keiho gama min lei alai lai in ima amudoh hih beh

jenge" atile aloipa chun, "Hichun ipi atina ahidem" ahinti tai. Aman jong "Hichun keiho hin Wireless phone kapohdoh masat pen ahi, atina ahi" anatipeh tai.

* Pasal khat Manager dia mi kihol naa interview din ana luttai. Board ho chun ahenga, "Nang hi keihon thudoh abaidom som ahiloule thu doh ahahjep khat bou kadong nom ui. Hoiche joh chu nadei em" tia adoh ule aman, thudoh ahah khat seh chu kadei-e, ahintin, amahon aheng a, "Thudoh ahahpa chu ahile, sun le jan teni lah a hi kojoh chu masa jep em" ahinti tauve.

Chomkhat akingaito jouvin, "Keima het dolin sun amasai" ahinti. Amaho lah a khat pan, "Iti dana sun nati ham" tin ana dong kit tan ahile aman, "Kei neidoh diuva ikinop tonau chu thudoh khat bou ahin, ni nalhin sah tauve. Hichu donbut da tange" ahintin, interview a chun 'Pass' ahidoh tai.

* Ojapu khat in school chapang henga, "Nanu hi sappaoivin 'Mum' nati jin, achutile nanu unu le anaonu chula sappaoiva iti ti nakou ding hitam" tin ana donge. Chapang pa chun, "Ojapu, kanu unu chu Maximum, chule kanu naonu chu Minimum kati ding ahi" ahinti.

* Ojapun school chapang khat ko ma, "Pathenin ajolou ipi um em" tin ana dongin ahile, chapang pa chun, "Ojapu Pathenin mi jouse akipa sah jou jipoi" tin ana donbut tai.

Editor :

Rev. M. Haokhothong,

C/o, T. Manchong

Nichols Higher Secondary School, Satribari,

P. O. Rehbari -781008, Guwahati, Assam.

Christian Meivah - sim te taona akiman peh jinge. Sumto kuma Rs. 100/- ahin, asim nom hon hin peuvin, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Naga land a sumto peh na thei ho :-

- 1) Ms. Lhingjanem Haokip, KBC
- 2) Mr. J. Manchong (Lunpu), KCC
- 3) Rev. Lhoukholal, Kangpokpi Missn
- 4) Mrs. Veikholam, Ideal school, cipur.
- 5) Mr. Henkai Lenthang, Medziphema,
- 6) Mr. Seikholun Singsit, Kohima.
- 7) Mr. Kapcha Singsit, Dimapur.
- 8) Mr. Hegin Lhungdim, Mizoram

Het-a phachom ho

* America a Costa Rica chung vanah songtum lentah khat mei in aleuva, ahung lensuh suh ana muve. Ahalsi khat khatte khat inchunga achun, Kg. khat vel ahin, song (Meteorite) chu akhol chil ule Silicon, Iron, Magnesium hon asem anahi.

* Nupi khat in acha li ho buhse lou adonsah got leh anom pouvin, hijeh chun guhthimin bongnoi toh ahalin, adonsah le abonun athi doh tauve. Bongnoi hi lou toh hallouvin aphai.

* Semthu ahtui, aumtai. Semthu pa akisuh keh leh alai-a a-eng lum chule akang chu thakhat in tui in a longdoh jin, ahtui tahbeh vang, alai a a-engpa hi alum chan aumin ahi.

Het-a phachom ho

* Lengpiga (grapes) hi tahsa din aphai, ajeh chu Vitamin A, C chule B. Complex aume. Ahinla neh jing lou ding ahi.

* Kidney stone neihon hai-sel (un-ripe mangoes) aneh le aphant chom pin ahi, atiuve.

* Brazil gama hou-in khat achung akhaang khin, go ajuh le twi ava va jitai. Achim lhah masangin tin Pastor pan nikhat mipi henga, maap kit hou-ina nahung tengule najokham khamu anche louhing, hon sohga, thille lo ipi hijongle nahin choikhom uva, asuma chu hou-in semphat loi ding angai-e, anati.

Sunday ni akaikhom phat un, mihon anche, dahdul, anchang, ho ahinchoi un ahi. Thikong sempa khat in, ken kabol theipen hiche hi ahin kahin choi-e, atin thikong khat (Coffin) ahin dom lut tai. Milun hung kikhom hon kidang asaue. Kong sempa golpa khat ahung ding doh in, "Ken hiche thikong hi i-pastor pau din dangka 10,000 in choh peh tange" ahin tin ahotai. Pastor pa chu akamsung ago leuvin, ahung ding doh in, "Ken, hiche thikong hi eiho numei lama Chairman din dangka sang 20,000 in kachoh peh tai" ati kit tai.

Miho athip chet tauve. Nupi nu chu ahung ding doh kit in, "Ken eiho houbung Secretary pa din hiche thikong hi dangka 30,000 in kachoh peh tai" ahinti tai. Hiche phat chun

Secretary pu chun, "Neitha doh diu khat hitai, hiche thikong hi ka ina kakoi koi ding alim lompoi" ati in ahung penjah phat chun, upapu khat ahung ding doh loi in, "Lunghang hih uvo, hou-in ikisah phatna diu joh khoh sah ute. Achutile hiche thikong hi ken asempa din dangka lakh khat in choh peh tange" ahintin lakh khat ahinpe tai. Hiti chun chomkah louvin hou-in semphatna ding lakh khat amu jengun, chule thikong sempa chun akong chu aina akinung poh in, a dukana joh din alekoi kit tai.

* Jharkhand gama upapu khat hi dammona anei jeh in amit ahotan, daming deinan hospital chom choma ana kivetsah in, Vellore gei a anachen, kho amu tapon, kumni alhing tai. Nikhat ajinu toh khola ache lhonin, inlama ahung kile lhon leh lampia aman ajinu henga, hoilai iphah lhon tah em, tin ana dongin ahi. Ajinun, tu tuhi Karipahari hou in mai iphah pet ahi, anati. Chuin aman, "Santhal christian ho seidan ahile Jesu henga ithum chan chu aman eipei, ativi[n, eini hou-ina chun lut hitin Jesu henga kakho muna din gatao hite" atin hou-in chu ajon lhon tai.

Hou-in kot chabi akikil jeh chun kot koma ading lhonin, atao thei chanin Jesu koma khomuna din anatao lhonin, in ahin jon lhon tai. Nilhah in pampot in ana chen, ina ahung kile leh kho amutan ahi. Aki pah behseh in Sunday nikhon hou-in a chun anakai pan lhon tai.